

Ataatsimiinnerup ammarneqarnera

(Inatsisartut Siulittaasoqarfiat)

Inatsisartut siulittaasuata tulliaata siullertut Inatsisartut Naalakkersuisullu 2022-mi ukiakkut ataatsimiinnissamut matumunnga uummammit pisumik tikilluaquakka.

Inatsisartut siulittaasuata Kim Kielsen ataqinartorsuarmit Dronningimit qaaqquneqarsimanini pissutigalugu najuutinngilaq, maangali Inatsisartut ataatsimiittarfiannut ulloq 27. september uteqqissalluni, taamaalilluni oqaluuserisassani immikkoortoq 3: Inatsisartut Siulittaasussaannik kiisalu Inatsisartut Siulittaasuata tullianik siullermik, aappaanik, pingajuanik sisamaanillu qinersineq aatsaat ulloq taanna pissallutik.

Taamatuttaaq Inatsisartut ulloq taanna ataatsimiititalianut kiisalu siunnersuisoqatigiinnut aalajangiisartutullu ataatsimiititalianut ilaasortassanik qinersissapput.

Takusinnaavara ilaasortat tamarluinnangajammik ukiakkut ataatsimiinnissap matuma aallartinnissaanut tikissimasut. Taamaalillutik Inatsisartut tamakkiisumik aalajangiisinnaassuseqarput.

2022-mi upernaakkut ataatsimiinnerup kingorna sinniisussat marluk Inatsisartunut ilaasortaajunnaarsimapput, tassalu Pipaluk Lyngø Rasmussen aamma Charlotte Pike, tamarmik Inuit Ataqatigiit.

Taamaalillutik Inuit Ataqatigiinnut sinniisussat marluk, tassalu Mariia Simonsen aamma Adam Kristensen, ataatsimiigiaqquneqarsimapput.

Uparuaatissaqartoqarnerluni?

Mariia Simonsen aamma Adam Kristensen, Inatsisartuni inissassinnut ingissinnaavusi tikilluaritsilu.

Inatsisartunut ilaasortaq Aslak Jensen Inatsisartunit tunuarnissaminik qinnuteqarpoq.

Uparuaatissaqartoqarnerluni?

Aslak Jensen, siunissanni pitsaanerpaanik kissaallutit pitsaasumik suleqatigiissimanitsinnut qujanaq.

Naalackersuisunut ilaasortap Erik Jensenip nalunaarutigaa Inatsisartunit sulinngiffeqarnini atorunnaarsillugu Inatsisartunullu ilaasortanngoqqilluni.

Inatsisartut sinnerlugit Ataqqinartorsuaq Dronning Margrethe Aappaat, danskit naalackersuisui, Folketingi, Islandimi Altingi, Savalimmiuni Lagtingi Nunavummilu inatsisartut inuulluaquakka, Inatsisartut ukiuani nutaami sulinissaanni pitsaasumik inerititaqarfiusumillu suleqatigiittuarnissaq kissaatigalugu.

Siulittaasoqarfik neriuppoq UKA2022-p nalaani oqallinnerit pitsaasumik inerititaqarfiusumillu ingerlanneqassasut, nunatsinni innuttaasut suli siuariartornissaannut aalajangiiviullutik.

Eqqaamassavarput oqaatsitta atorneqarnerat illersussagatsigu, minnerunngitsumillu avataaniit oqaasersiat oqallinnerni sapinngisamik atornaveersaassagatsigit.

Taamaalillunga Inatsisartut 2022-mi Ukiakkut Ataatsimiinnerat ammarneqartutut nalunaarutigaa.

Oqaluuserisassani immikkoortumut tullermut ingerlaqqinnginnitsinni minuttimi ataatsimi nipaallisimanissarput qinnutigissavara, kingullermik ataatsimiinnitta kingorna Inatsisartunut ilaasortaasimasut marluk, tassalu Aqqalukasik Kanuthsen, juunip ulluisa 24-anni toqukkut qimaguttoq, aamma Hendrik Nielsen, Indalêraq, septembarip ulluisa sisamaanni toqukkut qimaguttoq, kiisalu Naalackersuisunut ilaasortaasimasoq erfalasutsinnillu titartaasimasoq Thue Christiansen, juunip ulluisa 26-anni toqukkut qimaguttoq, annaasimagatsigit.

[Minutti ataaseq nipaallisimaneq]

Eqqaaneqarnerat ataqqinartuuli. Qujanaq.

Taamaalilluta aamma oqaluuserisassani immikkoortumut tullermut ingerlaqqissinnaanngorpugut.